

Tapah seberat 67kg dijual RM2,680

UM 24/10/23 MAS 35

JERANTUT: Seorang nelayan Sungai Tembeling meraih keuntungan lumayan apabila memperoleh tangkapan seekor ikan tapah seberat 67 kilogram di Kuala Tahan di sini.

Bercakap kepada *Utusan Malaysia*, nelayan tersebut, Sabaruddin Abu Bakar berkata, dia turun ke Sungai Tembeling sambil berdoa mengharapkan rezeki hasil tangkapan yang lumayan untuk dijual bagi menampung perbelanjaan keluarga.

“Saya turun ke sungai semalam dengan memasang beberapa batang taut menggunakan umpan dan keli di kawasan tebing dan kebiasaannya berdekatan lubuk tempat ikan berkumpul.

“Sememangnya sebagai nelayan sungai seperti juga penduduk sepanjang Sungai Tembeling, kita tidak kisah apa jenis ikan yang diperolehi asal-kah boleh dijual dan juga bagi makanan keluarga,” katanya di Kuala Tahan di sini semalam.

Menurut Sabaruddin, ketika menjengah pada taut dipangsanya, dia mendapati bunyi air kuat berkocak serta nampak seekor ikan bersaiz besar bergumpal di permukaan cuba



SABARUDDIN Abu Bakar (kanan) dibantu rakannya menaikkan ikan tapah seberat 67 kilogram ke daratan di Kampung Kuala Tahan di Jerantut, Pahang.

melepaskan diri.

“Saya agak terkejut serta menduga keadaan ini sudah tentu ikan bersaiz besar malah kemudiannya sudah tahu seekor ikan tapah berasaskan nampak ekor dan badannya ketika bergumpal di permukaan air,” katanya.

Katanya, dia berhati-hati menarik ikan tapah ke atas tebing yang tersangkut di mata taut umpan ikan keli supaya ‘rezeki’ itu tidak terlepas semula ke air.

Katanya, buat pertama kali

berjaya menangkap ikan sebesar saiz ‘anak lembu’ lalu dibawa pulang ke rumah untuk ditimbang sambil mencongak pendapatan apabila dijual nanti.

“Setelah ditimbang mendapati ikan tapah ini seberat 67 kilogram dan ini merupakan pertama kali saya peroleh tangkapan yang sangat berat. Sebelum ini saya peroleh antara dua hingga 20 kilogram spesies ikan liar ditangkap ketika menahan liar taut dan memancing di Sungai Tembeling,” ujarnya.